

拜經樓藏書題跋記

拜經樓藏書題跋記卷五

海昌吳壽暘虞臣纂

陰晉陵集

右陰子堅集一冊詩三十二首後附錄詩話 先君子從抱經堂借舊鈔錄藏記首頁云陰晉陵集爲周芑兮大令手輯其後予從盧紹弓學士借得一舊鈔本不知何人所集視周本多詩數首因錄其副以補毛氏百三名家刻之所未備附錄詩話乃周所輯

集千家注杜詩

右二十五卷前題東萊徐居仁編次臨川黃鶴補注後記皇慶壬子余志安刊于勤有堂首列集注姓氏自昌

黎韓氏迄廬陵劉氏辰翁按四庫書目二十卷元高楚芳編竝云本南宋書肆所刊楚芳略爲刊削而以劉辰翁評語散附句下已非其舊此本多五卷未知視楚芳本何如至楮墨精雅不減宋刻每葉二十四行每行大字二十小字二十六有雪莊張氏鑒藏圖記與向藏周禮重言重意所鈐用者同蓋精於賞鑒者也

杜律五言注解

杜五言律三卷元趙沔注吾族商山家塾刻本卷末一行云戊子春日之吉休邑商山吳氏七松居家藏板下有吳懷保印四皓居二圖記

韓文考異

右二十卷元刻本每頁二十六行每行大字二十小字
夾行二十首序無撰人姓氏次爲寶慶三年王伯大序
又次諸家姓氏又次李漢序汪季路書及凡例 先君

子書夾簽云按書錄解題載韓文考異四十卷外集十

卷今此本文集止二十卷外集不分卷數不知何故又

簽云查氏得樹樓本外集別刻目錄湖州謝孔大夫狀

後尙有疏一首

憲宗崩
慰諸道

題名七首然查本刻法亦有誤

題下注在後一行字畫校此本端整宋諱如廟諱慎字
敦字皆不缺筆蓋亦元刻也又簽云按此當卽留耕王
氏原刻所謂南劍本也第余攷秀水王惺齋讀韓記疑
云王伯大本每卷末附音釋若干條而此未見其音釋

惟散入注中譌舛亦甚多又豈後人翻王本歟

又

明刻韓文考異四十一卷朱崇沐本卷首無宋菑公一條墨筆補內有丹黃評點又卷中補注各條細書於上下眉頗徵用力之勤惜不著其名氏前後有秀水朱氏潛采堂圖書及查初白印二圖記蓋曾經竹垞他山二先生寓目者先君子書云秀水王元啟讀韓記疑云明新安朱崇沐刻是書脫誤甚多因其行世最廣故據此詳校俾讀者考焉據王說是此本誠未爲善本暇日當更以王記覆校之

笠澤叢書

右鈔本七卷補遺一卷 先君子校定爲蜀本題辭見

愚谷文存中 仁和趙寬夫跋後云笠澤叢書舊刻本

不傳久矣近時有吳門顧氏新雕本字畫精好然諦審
之譌謬疊見海甯吳槎客先生初借吾鄉郁氏本以勘
新雕本復校以拜經樓自藏本及林厂山本海鹽吾以
方本秀水蔣春雨本凡五校初用硃筆次綠次藍次墨
末復用硃而以蔣本二字別之又以文苑英華唐文粹
參校用黃色筆及硃筆合諸前五校爲七先生於是書
可謂勤且密矣郁氏本拜經樓本林氏本蔣氏本皆舊
鈔吾氏本則陸鍾輝所刊吳氏據宋本校正者也郁氏
有元人王益祥跋卽都元敬據以付刊者然無元敬跋

則或鈔自元刻無謬誤可依據其篇次不與顧氏新雕

本合

如紀錦裙在丙集首迎潮送潮辭在丁集首憶白菊及閒吟二詩缺重憶白菊詩在丙集末求志賦

下接問吳宮辭王益拜經樓本分七卷補遺一卷直齋詳跋在陸惠原跋前

書錄解題蜀本十七卷蜀人樊開所刊文獻通考云七卷十當爲衍字則七卷爲蜀本無疑矣特補遺一卷未知何時編入或書錄解題及通攷不數補遺耳前列魯望自序無樊序殆佚去案魯望自序云不類不次混而載之得稱爲叢書則分甲乙丙丁者陸氏原書式也以詩文分類析爲七卷者樊開所編也特字句較各本殊勝林氏本者後有阮林跋云得龔蘅圃鈔本校然不知出自宋元人何本無勝處不可信吾氏本訂譌僅數處

想多與郁本合蔣本分上下二卷編次與新雕本同惟少耒耜經一篇字句無謬足爲郁本之佐證若顧氏新雕本先生以爲似從黃俞部本出卽王貽上初得本也其中紀錦裙蜀本作記錦裙先生證以吳融詩謂作裙者是送豆盧處士謁宋丞相序先生以丞相爲豆盧瑑有宋字者謬皆確不可易坦旣借得校本手自繕寫浹辰始畢爰述其校勘次第各本優劣以質諸先生且以志嘉惠云嘉慶十六年十月廿一日書

又

右蜀本卽從舊本錄出後復從宋本附錄補遺一卷每葉二十四行行二十一字視各本多送小鷄山樵人序

漢三高士贊小雪後書事小名錄序諸篇 先君子記
云此卷行款字數悉照宋本

又

右中吳顧氏刻本 先君子從諸本校凡五次並補錄
小名錄序王益祥跋陸鍾輝跋及明王良棟康熙丁卯
翼蘅圃阮善長諸題識其始末具詳愚谷文存跋中此
本記云甲午秋日借錢唐郁陞宣東敵軒舊鈔本校用
硃筆復用拜經樓藏本校用綠筆乙未二月以文又購
得林厂山先生鈔本用藍筆校丙申秋仲復從海鹽吾
太學以方借其照宋本校正陸氏刊本用墨筆并補錄
小名錄序及跋辛丑九月又借得秀水蔣君春雨舊鈔

本校勘仍用硃筆將本惟分上下二卷無目錄前列樊
開序及自序卷末附陸龜蒙傳朱亥後序德原跋蔣本
前後篇數與刻本同唯少耒耜經一篇 復經周松靄
大令吾竹房太學校大令記云乙未正月初四日校起
初九日畢其確無疑義者用圈顯然謬誤者用擲至字
可兩通者用點於傍但心緒苦劣匆匆或有未盡處况
風庭掃葉此事本難免牀其再勘之松靄棘人周春記
吾竹房太學書云戊戌首春免牀先生以此書屬余校
勘勘法一遵松靄先生之例其是正處朱黃二毫爲勝
然蹲鳴鷄尸自昔爲然免牀其值本卽校勿以再三爲
限可也竹素後人吾進識 先君子又書紀錦裙篇後

云吳融集有古錦裙六韻自注云錦上有鸚鵡鶴陸處士有序此是錦裙而非錦裙明矣按鮑鈗道腴堂集云甫里集亦作記錦裙又書云按詳記錦裙文前言瓦官寺有天后羅裙佛幡皆組繡明是裙與幡爲二物復云李君乃出古錦裙一幅眎余云云似李君所藏衣裙與瓦官之天后羅裙無涉詳其制殆如今之霞帔故上狹而下廣前有鶴而背有鸚鵡的係子華所賦者無疑陸記又云縱非齊梁物亦不下三百年矣又曰曳其裙者誰歟其爲非天后羅裙益可見然其詩落句有武威應認得之語不知其何所指豈子華當日讀此記不審而亦認爲天后物耶書此俟攷古者更詳之嘉慶辛未除

夕又攷梁元帝詩云願織回文錦因君寄武威融詩用
武威當出此非指則天也又記 張文漁徵君書云笠
澤叢書余向有碧筠草堂刊本好友陸白齋又贈何義
門先生校本自喜所藏稱善矣今假兔牀先生所校集
諸家之大成較何本訂正更多按碧筠不爲吳人王岐
所書筆訛尤多先生一一改正以說文爲宗且有益於
小學不僅爲甫里功臣也又紀錦裙一首先生校正是
裙字非裙字引吳融集古錦裙六韻自注云上有鸚鵡
鶴陸處士有序爲證皆刊本所沿訛者先生精心校之
後之求叢書者不得朱袞樊開本當以先生本爲甲觀
矣乾隆乙巳七月十九日海鹽張燕昌識於冰玉堂

黃堯圃主事書云紀錦裙一首兔牀先生引吳融詩爲
證可破羣疑矣余謂裾與裙雖各本不同而篇中曳其
裾者裾字本不誤且曳裙未見所出斷非裾或爲裙之
誤也承兔牀借讀附著於此嘉慶乙丑四月十有九日
堯翁黃丕烈識

又

右陸氏刻本 先君子從慈谿畢氏所藏何義門先生
校本烏程嚴氏所藏何仲子校本勘對並錄義門跋云
此冊丙寅歲大人從江右雜書中攜歸以其脫誤難讀
久置敝篋中己丑秋適從虞山錢氏借得馮已蒼所傳
元板佳本因取而改竄以示後人使知鈔本之不足據

如此若能細寫一淨本便自可讀亦不負吾區區讐比之意也焯記又此書別有編爲八卷者以自序冠之則此四卷者乃舊次八卷分雜著與詩而二之便非不類不比矣或謂八卷乃宋刻殆耳學也焯又記仲子跋云借華山馬寒中所藏宏正中鈔本校鈔本雖未經校勘訛誤觸目詳其所自卻從宋本胥錄究爲善本觀者幸不以訛誤而忽諸康熙戊戌秋又八月之一日仲子記先君子書後云乾隆丁酉夏日鮑君以文爲借得慈谿畢氏所藏何義門先生校本因傳錄於此叢書舛譌至多予廣求善本讐比至此凡七本矣常欲別刊一本以正江都吳下二刻之失未知何時得遂斯願也甲寅

夏日烏程嚴久能茂才又以所藏何仲子小山手校本見借因復校一過 又記義門先生跋後云畢本後附宋刻叢書八卷目錄與予舊藏鈔本略同故不錄兔牀記 又書紀錦裙曳裙二句下云按吳融有古錦裙六韻自注云云而蜀本笠澤叢書亦作記錦裙似魯望所記者乃錦裙而非錦裙然文苑英華亦作記錦裙蓋仍訛已久矣觀此二句則斷非裙亦與瓦官無涉疑瓦官者乃武后之羅裙而魯望所記與吳融所詠者是李侍御所藏之古錦裙不得混而爲一也 又書卷首云陳直齋云叢書爲甲乙丙丁者詩文雜記政和中朱衮刊之吳江末有賦用蜀本增入蜀本七卷邨人樊開所序

據陳氏之說是蜀本刊在朱袞前矣自元符庚辰至政和辛卯凡十二年
予舊有鈔本七卷笠澤叢書以諸本會勘之定爲蜀本
倘能刊之當遠勝此本矣

又

右亦陸氏刻本前有甫里先生像馮君補亭所贈先
君子記云嘉慶乙丑秋日馮爾修茂才以此本見寄時
爾修已瞽三載矣

張承吉集

右唐張祐承吉撰舊鈔本首題張處士詩集凡六卷無
序目按晁志作一卷

黃御史集

右曹氏刻本八卷末爲附錄前有洪邁楊萬里謝堦三序及曹學佺重刻序 四庫書目作十卷附錄一卷云原集久佚此本乃宋淳熙中其後人所重編今此爲八卷未知視閣本何如首有敬亭山人家本潛溪二圖記

禪宗永嘉集

永嘉集唐僧元覺撰慶州刺史魏靖輯宋石壁僧行靖注凡二卷首有楊億所撰無相大師行狀

讒書

讒書五卷 先君子從堯圃先生借本校刊跋見愚谷文存又鈔本一卷至四卷堯翁錄寄有題語

碧雲集

右李中撰卷分上下首有孟賓于序舊鈔本 先君子以琴川毛氏東山席氏二家刊本校硃筆記歲月於後跋云李有中南唐時爲新淦令嘗與張洎韓熙載潘佑徐鉉諸人相友善故多投贈之什所著碧雲集水部郎中孟賓于爲之序尾題癸酉者蓋宋開寶之六年也序中摘錄秀句方之方干賈島良不爲過然余讀餘篇見其眷懷邦國如有隱憂者正復不少則又杜牧羅隱之儔矣惜當日舉國風靡淪胥罔顧屈指曹彬南下之歲距賓于序集之秋寒暑僅再周耳虞之不臘明者已早燭其必然孰謂握三寸不律而仰屋梁者遂不曉事耶是集按晁氏讀書志及文獻通攷所引並云二卷惟曝

書亭藏書目作三卷予此本得之烏夜村張氏卷數適與之相符何古今本之不同也又序言五六七言二百篇而此時三百餘篇豈後人附益而重編之歟書此以俟它日考定云乾隆甲午立秋日免牀吳某識

河東集

河東先生集十五卷舊鈔本有附錄 四庫書目作十卷附錄一卷按景序明言十五卷近慈谿柳氏有重刻本抱經先生竹汀先生並爲之序均未詳卷數未審視此本何如當更訪之 先君子書鐵圍山叢談江南徐鉉歸朝後一則於前云據此則仲塗文章雖擅一時而人品不無可議張景行狀謂不拘小謹蓋其微詞而陳

直齋亦云開爲人史稱其傲很剛愎合觀數語則開先時自名曰肩愈者不亦妄乎戊戌春日偶從武林得舊鈔本漫題首簡

穆和南集

右舊鈔本穆修伯長著三卷附錄遺事有劉清之跋有呂氏藏書恥齋二圖記

古靈集

古靈先生集二十五卷宋刻本每卷前有子目未有使遼語錄一卷乃諸本所無者詳先君子愚谷文存跋語中每葉二十行每行十八字雖間有關翻及文字漫漶處然紙墨精雅古香醜醜誠宋本之甲也己卯夏錢

唐何夢華少府過談云新得舊本古靈先生使遼語錄
一種未知卽集中之本否擬借校尙未果也

又

鈔本古靈集二册乃曹氏古林書屋藏本有曹溶私印
潔躬二圖記無關葉有關字校刻本多本傳及年譜二
篇 先君子以宋本及小艸齋藏本校記後云乾隆甲
寅長夏以所藏宋刻本校讐一過宋本乃鮑綠飲歸余
二本互有存佚鈔本與謝在杭藏本相同刻本多使遼
語錄一篇尤世所希覲也是歲秋七月記

宛陵集

宛陵集六十卷吳樵石先生評本書卷首云宛陵先生

謂作詩須寫難言之景如在目前含不盡之意見于言
外今讀其集方知此語實先生自道所得也敬業師曾
語余宛陵正是突過摩詰又云宛陵仍是唐音非宋調
也阮亭詩話作詩曰典曰遠曰諧典諧易得遠字惟韋
蘇州及宛陵到之先君子記云右跋當爲吳樵石先
生筆樵石名嗣廣字芑君邑諸生嘗以詩受知於初白
先生故稱敬業師壬申秋日記又書後云宛陵集爲
吳樵石先生評點樵石名嗣廣字芑君樵石其號海甯
硤石人工詩與錢坤一汪匡古諸君往還唱和身後遺
書多散佚予嘗從其孫曉亭見樵石詩稿若干卷今曉
亭沒久矣不知此稿尙存其家否予藏弄宛陵集亦幾

五十年矣嘉慶壬申七月八十老人吳某記於小桐溪
之拜經樓

嘉祐集

嘉祐集十四卷 四庫書目作十六卷云洵集在宋凡
四本曾鞏作洵墓志稱二十卷晁氏陳氏著錄皆十五
卷徐氏傳是樓紹興十七年婺州槧本作十五卷附錄
二卷又有邵仁泓翻雕宋本與徐本小有異同亦十六
卷今所傳者有兩本一爲凌濛初朱墨板本十三卷又
有蔡士英刻本十五卷曾鞏所誌與晁陳所錄今不可
見以所存四本相較當以徐氏宋本爲近古今用以箸
錄而以邵氏宋本互核焉是本卷數與諸家悉不合紙

墨頗舊惟無序及刊刻歲月未能定爲何本耳

王梅溪集百家注東坡先生詩集

宋刻王梅溪集注分類東坡先生詩集每葉二十行每行大字十九小字夾注二十五前有建安萬卷堂刊梓於家塾長墨印卷首有慶元路題學副使曬理書籍關防鈐記及濮陽李廷相雙檜堂書畫私印圖記先君子跋見愚谷文存續編此本來籤云續文獻通考元時儒學提舉副司管祭祀諸職兼送到典帙按李廷相錦衣衛籍濮州人洪治壬戌進士累官戶部尙書兼太子賓客贈太子太保謚文敏有南銓稿二卷聯句一卷見千頃堂書目又書別紙云王梅溪分類蘇詩注二十五

卷不及和陶詩迨施元之編年注始合刊之按苕溪漁
隱叢話云前集乃東坡手自編定後集乃後人所編惜
乎不載和陶詩然則當時人刊東坡詩多不及和陶詩
無足怪也按馮星實刻文忠詩合注凡例所見元刊本
王梅谿百家注或云末卷和陶余未見之此
亦傳聞未確也庚溪詩話崇寧大觀間蔡京當國禁蘇軾文詞
墨跡而毀之政和間忽弛其禁光堯太上皇朝盡復軾
官職今上尤愛其文章乾道初梁叔子任掖垣兼講席
一日宿直召對上曰近有趙夔等注軾詩甚詳卿見之
否命內侍取以示之乾道末上遂爲軾御製序贊冠其
文集命有司與詩集同刊之先君子長歌一首見拜
經樓詩集此本後附錄並記云宋王梅溪集百家注東

坡詩近所行本皆後人妄行竄亂芟併全失本真與宋商邨所刊施注蘇詩無異觀者每以不能一見宋刻爲恨今夏有茗賈持此書抵余家求售適余他出不值而去明日余歸操舟訪之始得諸硤石南湖中遂以善直購焉此書楮墨精雅古香襲人眞舊本之最佳者爰爲長歌以書其後當乾隆五十一年夏重午後二日兔牀吳某識男壽暘書 又夾簽云吾友鮑君以文嘗疑百家姓氏中胡銓字邦衡爲後人妄添謂胡侗姓名偶同而實非忠簡公子竊以爲不然按注中明有引邦衡曰者則其爲忠簡無疑鮑君又謂忠簡廬陵人不應冠以茗溪子按書中只以茗溪冠胡仔姓氏上而胡侗上偶

失著廬陵耳如潘大臨大觀皆黃岡人而列豫章之後
徐俯臨川人而列臨安之後此並注家之鹵莽也

又

右蘇詩王注三十二卷末二卷爲和陶詩何義門先生
評本每卷皆題記歲月卷末記云蘇詩僅三十二卷閱
之而月始畢讀書如此作輟雖慧者難望有成況愚鈍
如予者乎放筆爲之惘然癸酉九月鈔摘坡公佳句五
日而畢漫記書尾 此本 先君子從知不足齋借臨
書後云乾隆乙未以文購得王注蘇詩及唐音戊籤並
何義門太史評本凡去價十千蘇詩是陳少章先生臨
本因從之假歸倩朱君允達錄于此本戊籤別自臨之

時丙申夏五吳某記 丙三十一卷中問淵明一首宋本在第一卷非和陶詩也 先君子特爲拈出

蘇詩補注

蘇詩補注五十卷查初白先生手稿桐鄉汪氏藏本面頁題初白翁原稿擁書樓收藏並有梧桐鄉汪氏擁書樓所藏圖記卷首自序云補注之役權與於癸丑迨己未庚申後往還黔楚每以一編自隨己卯冬渡淮北上冰觸舟裂從沙泥中檢得殘本淹浥破爛重加綴葺辛巳夏自都南還夜泊吳門遇盜探囊胠篋之餘此書獨無恙也自念頭童齒豁半生著述不登作者之堂庶幾託公詩以傳後因閉門戢影畢力于斯追惟始事迄今

蓋三十年矣雖蠡測管窺何足仰佐萬一顧視世之開
局於五月歲事於臘月半年勒限艸促成書淺深得失
必有能辨之者康熙壬午仲春初白菴主人查慎行識

先君子記後云右爲初白先生手定注稿視嘉善刻
本多有異同嘉慶己巳試燈日老友鮑綠飲自梧桐鄉
過訪謂有初白注蘇詩手稿予出此眎之相對恍然蓋
先生注此書數易其稿始成具見良工之苦心也庚午
夏日鄉後學吳某跋于西籬之小絳雲軒時年七十八又云
桐鄉馮星實補注蘇詩屬其戚項根堂從予借宋刻王
狀元注蘇詩不意爲中閣故馮刻所引王注亦多不全
未免遺憾翌日槎客又記

樂城集

鈔本前集五十卷插花山馬氏藏本首頁有玉音孝友著於家庭信誼隆於鄉黨朱文印卷內有古鹽官州馬思贊之印馬寒中印華山馬仲安藏善本及秀水朱氏潛采堂圖書諸印記鈔寫及書側題識俱精整

後山集

後山集二十卷舊鈔本先君子以秀水濮氏校義門先生評本倩先師朱巢飲夫子過錄記卷首云何義門先生評本乾隆丁酉從濮自崑先生校本過錄義門跋云老學菴筆記云陳無己子豐詩亦可喜晁以道集中有謝陳十二郎詩卷是也建炎中以無己故特命官

李鄴守會稽來從鄴作攝局鄴降虜豐亦被繫纍而去無已之後遂無在江左者豐亦不知存亡又康熙己丑秋日從吳興鬻書人購得舊鈔後山集殘本中闕三四五六凡四卷勘校一過改正脫訛處甚多庶幾粗爲可讀而明人錯本誤人真有不加不刻之歎也焯記又后山集十年前始得見明宏治己未南陽王懋學所刊脫誤至不可讀訪求宋刻于藏書家而未獲也康熙己丑吳興鬻書人邵良臣持舊鈔殘書五冊來售余取而與宏治本互勘則其所脫誤者皆在雖出於元版已非魏昌世所次詩六卷文十四卷之舊然猶之爲善本也其中缺第三至第六凡四卷非仍得陳同甫編校者及向

上宋本不敢妄爲補寫蓋新刻有與無均耳不讀而充數者尙之弗如其無也是歲中秋日何焯記

雙峰集

雙峰先生集九卷初白太史校本前有八世孫泰亨及永樂丙申徐鍊正統元年劉球序後有李大異撰墓誌七世孫佳及永樂二十二年舒仲誠洪武癸酉劉鉞跋及高才贊 初白翁手跋云是集初刻於宋寧宗嘉泰四年公季子邁所編先生自序題曰雙峰猥彙至理宗淳祐七年再刻于連山章枕山有序元初公之七世孫名世重刊有歐陽冀公序未幾板燬洪武中八世孫泰亨以家藏舊雕本重刻於南昌訓導劉鉞志其本末正

統中十世孫守中重刻劉忠愍爲之序今所鈔者照正
統本第八卷中缺七言律詩三首第九卷中缺訓後一
條據別本補入康熙庚子重陽前四日慎行識 所補
之條書于卷首云慎行於江西書局見是集鈔本第九
卷中尙有訓後一條今補錄惟余之在職存心處事必
欲上通天意下合人情買田築室勤儉得之後世子孫
優必聞于詩禮勤必苦於耕讀教子擇嫻慎終追遠毋
螟蛉異姓以亂宗祧毋勇很非爲自罹刑憲倘違是言
則必爲人指笑曰舒通直郎子孫所爲如此可不慎哉
此條補寫第九卷中此冊有慎行初白庵主南書房史

官諸圖記

雪溪集

右舊鈔本止五卷 四庫書目云原本八卷今佚三卷
蓋不復有足本矣此本卷心題觀稼樓鈔書有玉峯徐
氏家藏及沈廷芳芥園晦藥軒諸圖記集中載國香詩
二首二原作一次韻其元唱非銍作也銍詩乃次韻耳
鈔本不標題名氏而以元作附錄者書前致相溷耳安
得它本正之壬午立春日又記

夾漈遺藁

右舊鈔本三卷詩五十六首文七篇

鄂州小集

右六卷 國朝程哲輯錄此從程氏刻本傳錄者首有

天章本別集見目錄卷三
哲序並鄭玉趙沔趙燠李宗頤宋濂王禕馬瑊蘇伯衡
林公慶祝允明諸原序裔孫文達從裔孫朗原跋及曹
涇撰傳等篇後附郢州遺文 四庫目錄作六卷附錄
二卷此本附錄卽在六卷中目錄謂其集本劉清之所
編此本叢雜少緒似非原帙又云附錄二卷爲其兄頌
姪似臣之文今是編但有頌文而無似臣文

網山集

舊鈔本月魚先生網山集八卷有劉克莊林希逸二序
誠齋集

舊鈔本誠齋集四十二卷無序目後題嘉定元年春三
月男長孺編端平元年夏五月門人羅茂良校一條卷

內有朱筆藍筆評點及校字每冊有以寧呂叔子印楨以寧之印諸圖記

後村集

右五十卷藍格鈔寫極精卷內朱筆評點前有秀水朱氏潛采堂圖書印卷首林希逸序目錄後題迪功郎新差昭州司法參軍林秀發編次後有武林盧文弨手校圖記 四庫書目作六十卷今此實止五十卷

玉楮集

右刻本八卷據 先君子錄抱經先生跋於前並書後云右玉楮詩彙八卷據岳倦翁跋自寫清本凡百零七版今正合其數每卷首題十六世孫元聲等藏墨殆明

時卽依倦翁手錄傳寫付梓故版數適符而字句間猶不免魚豕何耶至跋中又云偶至海甯訪友云云海甯不知何地攷今海甯州宋時鹽官縣至元天厯二年始改海甯縣惟歛之海陽縣晉初嘗稱海甯縣隋改休甯縣是宋時亦未嘗有海甯之稱豈亦刊梓時人妄改或係後人僞造此跋然元聲爲時名臣刻其先集不應鹵莽若此也偶讀盧學士抱經堂集跋玉楮集云未見刊本因錄其跋語於卷首以見前輩好古之篤并憶先生昔過艸堂登拜經樓徧覽藏書而此編惜未寓目今先生之歸道山已十餘寒暑聞抱經堂遺書散佚殆盡而予之抱殘守缺所藏雖未能若先生讐校之精幸而未

散然歐公有言物聚於所好而散於所不好人生數十
寒暑耳孜孜矻矻露鈔雪購欲子孫常爲世守而弗替
豈不難哉豈不難哉嘉慶十三年歲次戊辰中秋日海
甯吳某識 又書首頁云昔張杞園嘗以玉楮集貽王
漁洋乃明衡府高唐王所鈔漁洋有跋以爲楮墨裝潢
竝極精妙未識視此何如庚午五月某又記 又別紙
錄蠶尾文集跋語一條書下云按高唐王與吾家舊藏
臨江王圖繪寶鑑裝潢精整蓋明宗潢之好古者識之

孝詩

林同撰一卷劉克莊序查初白先生從崑山徐氏借千
頃堂鈔本傳錄前有臨安府柵北大街睦親坊南陳解

元宅書籍鋪刊行一條後有跋云林同字子真寒齋林公遇子福唐人卽宋史忠義傳中林空齋也史逸其名予考證得之爲載入統志人物中戊辰元旦書不著書者名氏 初白先生記云此金陵黃氏千頃堂鈔本乙丑余客都下曾於俞邵案頭見之今歸玉峯季子甲午九月借鈔畢附識初白翁下有慎行初白菴主得樹樓藏書查慎行印南書房史官及查岐昌印諸圖記

肇論中吳集解

中吳集解三卷釋淨原集釋僧肇所作四論而解之者首有慧遠序末有淨原後序宋本傳是樓藏書有東海臣炯別號自彊徐章仲所讀書徐炯章仲徐炯收藏書

傳是樓二漢書屋徐炯收藏秘笈宋本諸圖記書側題
識猶其手筆也菴竹堂書目載此書不記卷數但云三
册

中和集

元本中和集三册前題都梁清菴瑩蟾子李道純元素
撰門弟子損菴寶蟾子蔡志頤編前集一卷後集二卷
續集三卷別集四卷新集五卷外集六卷無序按菴竹
堂書目載此書一册不記卷數道藏目錄載是書六卷
並謂爲通儒貫釋之至言

柳塘外集

右舊鈔本二卷釋道璨撰口師孔序 四庫書目作四

卷與此不同按師孔序云錄其詩百有二首今集中之數相符似無缺佚閣本所據蓋別本耳是册前有海寧楊氏崑木藏奔翰墨圖書傳之有緒二印記

佩韋齋集佩韋齋輯聞

舊鈔本佩韋齋集十六卷熊禾序輯聞四卷德鄰自序前有海鹽夏曉峰書畫記印後有聞人訥甫秘笈之印木印

富山嬾藁

舊鈔本富山嬾藁十九卷前題從曾孫方宗大編集有周瑄商輅二記周序謂曾孫宗大既嘗編次今五世孫文傑復能珍藏校正以壽諸梓云云蓋是本爲重編付

刊 四庫書目作十卷或猶是初本與

滄浪先生吟卷

舊鈔本嚴滄浪集二卷陳士元黃清老編校黃公紹序

宋高僧詩選

舊鈔本宋高僧詩選前集一卷後集二卷續集一卷陳起輯

剡源文鈔

右刻本四卷前有本傳自序 先君子親筆評點記後云予心慕剡源文集數十年嘉慶甲子始購得是編而讀之漫識卷尾齊雲采藥翁時年七十又二又書居易錄戴

以古文明淳祐大德間與柳貫齊名數語於卷首云按

宋淳祐時表元年方幼齡下至大德幾五六十載且道
傳生更後亦不得云齊名 又附錄馬寒中先生跋語
於卷首寒中跋云歲丙辰丁巳黃梨洲先生講學海昌
先君子時與之往復議論惜思贊童稚未能備悉精
奧也先生每極口宋戴剡源文府君購其集不可得後
從叔氏日觀齋見先生所寄選本遂命思贊刻之家塾
閱歲書成府君見背年來多故未暇整理昨冬與竹垞
先生借得全集復發興修補欠葉校讐譌字其去取批
抹悉依梨洲原本不敢妄有增損蓋遵先府君投刻之
意也因憶幼侍府君與先生晤對已歷二十餘寒暑而
府君卒於庚午先生與日觀叔亦相繼下世重展是集

不勝憮然康熙庚辰七月既望海甯馬思贊識於紅藥山房

魯齋遺書

舊鈔本魯齋先生集六卷末卷爲附錄首有嘉靖九年康海序嘉靖三十年衡府新樂王序王序署分封青社衡藩新樂王誠軒道人載璽汝符父書於少和山房此本有不遠復堂難得幾世好書人趙北溟印無黨蘊真翼雲恥齋諸圖記考明史彙列傳新樂王博雅善文辭諸撰集多可傳者高唐王厚煥齊東王厚炳皆以博學篤行聞亦可見衡府之多賢王也

道園學古錄

道園學古錄五十卷元刻本每葉二十六行行二十三
字前有至正六年歐陽元序爲陳書崖先生藏本有劉
氏家藏陳氏家藏書崖珍秘天都陳氏承雅堂圖籍陳
書崖讀書記陳氏藏書子孫永寶諸圖記 先君子八
分書題前云予友鮑綠飲嘗云生平見學古錄數本獨
未見此本驗其楮墨之精當屬元時初刻本又爲覓舊
鈔學古續錄見遺俾成合璧云嘉慶癸亥秋九月旣望
吳某志所云學古續錄卽道園遺集乃公諸孫堪手輯
至正庚子黃潛跋某又記

道園遺藁

右鈔本六卷綠飲先生所贈末卷爲樂府附鳴鶴餘音

乃公與全真馮尊師合作蘇武慢無俗念詞也是編爲
從孫堪克用所輯前有至正己亥楊椿序後有至正二
十年黃潛序堪有題識樂府後有公自記及金天瑞跋
四庫目錄作十六卷與此不同今觀楊序云凡七百
餘篇皆板行二集所無者遂分類編次爲六卷者一樂
府題曰道園遺藁是所收當止此十六卷者或併二集
數之歟

陳眾仲集

右元刻不全本僅存詩賦三卷序一卷首有明沈氏麟
手書元史本傳并記云眾仲集不多見嘉靖丙申偶得
此元朝刻本因手錄其傳於前以識歲月七十二翁竹

東沈麟書 先君子題云按千頃堂書目陳旅安雅堂集十三卷今世行本大約相同予舊藏此元刻本二冊題曰陳衆仲文集攷諸家簿錄皆未見有此目未審其同異若何卷首林泉子序作于至正辛卯距衆仲之卒已十年當是其子頤最初刻本雖厯存四卷而詩則已全零編蠹簡何可不什襲珍之免牀記又書別紙云按元史本傳文集十四卷不知卽此集否簡明書目安雅堂集十三卷遺書目云十四卷元百家詩選小傳安雅堂集一百廿四首元刻陳衆仲集一二卷一百六十九首三卷一百五十九首通計三百廿八首較元詩選多二百四首

陽

按堯翁手札知其家有元刻七卷並多張燾序

一篇會許補入當更訪之

方叔淵橐

方先生遺橐五言詩四十二首後至元己卯樊士寬所鈔有跋及次先生自趙屯歸城中韻詩又有王東題語是冊面葉題寄樓鈔藏有寄樓東萊仲子手鈔二印記

江月松風集

江月松風集十二卷金氏憲邦從思復先生手書本鈔藏筆札甚精後有詩補二葉明陸嘉穎補四首曹潔躬先生從所藏元人真蹟補再次廷璋長史留宿韻二首題云余家藏元人真蹟有此二詩乃知江月松風集尙多遺佚思復以書名卷冊流傳人間者隨見當補入也

又從玉山名勝集李氏畫卷崑山雜咏補詩三首金跋
云錢思復爲有元詩家筆墨牋冊多有傳者獨全集渺
不可見洞庭山齋得觀思復手書江月松風集爲錢叔
寶曹潔躬所收藏紙墨完好殊可寶愛因手錄一通藏
之篋笥并使同志者得共傳覽焉丙寅閏四月二十五
日金憲邦記後又錄補遺二首書云戊辰嘉平月小除
夕燈下錄於半園之條然亭迂齋 四庫目錄云其集
在明不甚顯此本乃曹溶得惟善手稟因傳於世蓋卽
是本所從出也

夷白齋集

右舊刻十二卷義門先生手校本多所補正卷末鄭國

公王處士二墓志先生從吳下冢墓遺文所錄石刻補
正版本漫漶處手書於後云夷白記末卷鄭國公王處
士二志板本漫漶予從汲古閣借得錢叔寶手錄吳下
冢墓遺文續編二志在焉據叔寶云錄于文氏停雲館
所藏石刻者余取□□□□則企□□□□刻所避而
刪□者乃非一處□□□□復不免聞往時述古堂收
藏夷白□□□□當年稿本不知今落何人手得之乃可
是正耳康熙庚寅焯記 又讀王處士志可見淮張待
士之厚草竊破亡而遺者猶思之不置蓋有足以感人
者耶淮張無大略遠謨此固其一長也又記 惜是冊
間有剝落補字及跋語未能盡讀爲憾耳按讀書敏求

記三十五卷外集一卷云宏治乙卯張習廣搜敬初詩
文勒成十二卷刊之志其後云先生文集名夷白者三
十四卷留吳下士大夫家秘不傳蓋當時原書難覲故
所刻不全君子惜焉此從其稟本摹寫者 先君子書
此條上云綠飲題云張習刻本每有出於三十五卷之
外當時所據者不知何本又玉山雅集錄敬初詩大半
不在集中知夷白齋稿遺佚者多矣安得好事者廣爲
搜輯以永其傳焉 按此本後無習題識而楮墨精雅
當是宏治初印本耳

石門集

舊鈔本石門集十五卷嘉慶壬子李先芳序黎卓傳鶚

後序 四庫書目作七卷未審視此本何如

斗南老人集

右鈔本四卷間有缺字首序題墨林後學

說學齋彙

危太僕集四卷鈔本吳石倉先生藏書有朱墨筆校補處卷首有石倉手校及吳口嘉印州來氏藏書記二印卷首載竹垞先生說曰太僕說學齋文傳鈔都非足本雲林詩集係葛邏祿易之所編前有虞伯生送行序卽後雲林集三卷是也

雲林集

雲林集鈔本南陽迺賢易之編虞集伯生序詩二卷文

一卷查初白先生藏本有其手校及南書房史官印記
卷二後初白先生手書云按黃文獻公潛所作太常博
士危府君墓志府君諱永吉字德祥徙居雲林三十六
峰之陽卽太樸之父也詩名雲林集當以此慎行識又
云虞伯生有清明山房詩爲危太樸作又次韻太樸讀
書山中見懷之作二首皆載學古錄二十七卷歸田藁
中今檢雲林集皆失原作又宋景濂有題危雲林訓子
四詩詩後云危公冢子字於幃自檢討奉常遷佐薊州
將之官賦四言詩一章勉之云云今亦失原作卷一後
補梅仙峯七律一首從撫州舊志采出亦先生親筆

林公輔集

天台林公輔先生文集一冊不分卷初白菴藏本補書目錄于前並跋云林公輔名右明洪武朝人被薦授職閣門下所著文計一百五篇不分卷帙余得鈔本於友人齋頭補綴破爛別錄如右原本舊用硃墨校閱每篇段落及字句之間多有鈎畫甲乙處於作者命意眉目分明要是留意於先民矩矱者故并其圈點悉依原本以存其舊焉初白翁又按先生臨海人洪武中與葉見泰等並徵官中書舍人與方正學友善嘗奉璽書行邊有功進春坊大學士命輔導皇太孫以事謫中都教授棄官歸靖難初聞正學被禍爲位哭於家成祖召之不至械至京猶欲用之先生對曰罪人逃死已久藉令可

手集和詩書是吳言先三
仕當與方孝孺同朝矣成祖怒劓之死南渡後追贈禮
部尙書諡貞穆事載華亭明史列傳世但知先生爲文
士罕有稱其忠義者特表出之康熙辛丑四月查慎行
再識

滄螺集

孫大雅著六卷前有宋濂撰東家子傳後有薛章憲跋
汲古閣刻都元敬校本

草閣集

草閣集六卷後附筠谷集一卷宋濂序後跋不全未知
撰者名氏

圭峰集

羅文肅圭峰集三十七卷錢湘靈先生評本朱墨紛綸
印記重疊 四庫書目三十卷此多七卷

姑蘇雜咏

右一卷明高啟著周傳編有洪武四年啓自序三十二年傳後序卷首有構李頂藥師藏堯峰山人諸圖記

六臣注文選

六臣注文選三十卷汲古閣刊何義門先生七校本
先君子從盧學士抱經堂借本手錄並書首頁云按唐
書曹憲傳云憲始以梁昭明太子文選授諸生而同郡
魏模公孫羅江夏李善相繼傳授於是其學大興句容
許淹者自浮屠還爲儒多識廣聞精故訓與羅等並名

家羅官沛王府參軍事無錫丞模武后時爲左拾遺子景倩亦世其學以拾遺召後歷度支員外郎善見子邕傳今世第傳文選六臣之注而餘人罕有著聞者

唐音戊籤

戊籤八百十七卷義門先生評本 先君子從淥飲先生知不足齋借錄後六冊係巢飲師手書並補鈔缺頁記後云戊籤六冊臨始於閏七月之朔畢於九月九日日閒不無作輟過於燈下者居多是以作字蠲細不勻中閒缺頁俱爲補寫但未釘入耳至字畫疑者闕之無疑者易之然尙有疎忽處鉅眼可復校正焉丙午九月燈下書於金閭之客館巢飲識 先君子書云何義門

學士評點唐音戊籤攻韻語者得之不翅枕中鴻寶恨其流傳甚少此本予從知不足齋主人借錄有六册未竟朱巢飲茂才時館於姑胥小漆園中適見予行篋有此六册遂爲卒業焉嘉慶庚午春兔牀山人識時巢飲沒已越歲矣 其中夾籤甚多爲從兄梅峰先生手筆先子記曰從子延清摘其可疑者簽出有爲予筆訛亦有原本謬者不無有益於此書也

戊籤餘

右戊籤餘橐本有硃筆有藍筆評點並按語又別紙書云法雄寺東樓 七絕 釋圓至日郭氏王孫富貴封爵至開成後猶不絕其宅不應在貞元元和中已爲寺然郭

隋傳云盧杞秉政多論爭郭氏田宅德宗稍聞乃詔曰
子儀有大勲嘗誓河山勒金石自今有司毋得受按按
此詔雖禁有司論奪未嘗以應有者還之也夫以子儀
之內木寒而不保其室德宗待功臣何薄耶 是書本
八册 先君子以七册贈文漁徵君而留其一書後云
予收得戊籤餘八册海鹽張芑堂明經愛玩不忍釋手
因割七册貽之而自留此册以見前輩用力之勤非後
生所能及也己酉夏日槎客記又云余所藏有何屺瞻
學士評閱唐音戊籤全部極精誠學詩者之津筏也庚
午暮春又記

唐分類歌詩

趙孟奎分類唐歌詩原本百卷此僅四冊蓋從宋本影鈔者首有咸淳改元孟奎自序序後爲總目分類凡七天地山川類三十二卷朝會宮闕類八卷經史詩集類三卷城郭園廬類二十卷仙釋觀寺類十二卷又十一卷

此十一卷疑別爲一類

偶脫去標題名目一行耳

手兵師邊帥類二卷草木

蟲魚類十二卷每葉十八行行十八字總目及每卷首行題某類卷第幾下空二格題趙孟奎又空一格題分門纂類次行題唐歌詩下列總卷數目蓋亦所謂大名在下小名在上者每卷各有子目每首詩前低二格書題次行低五格書人名行款亦爲近古後有毛斧季二跋及附錄葉文莊書唐歌詩後一條先君子跋見愚

谷文存此書云何義門評點唐音戊籤中一條云趙孟奎分類唐歌詩殘本十餘卷汲古毛氏收得之今歸蔣生下道然則予在吳門所見者豈千道所藏本耶當更訪之己酉立夏日某又記又云嘗見劉一清錢塘遺事載咸淳間詔行官田之制趙孟奎自陳投賣蓋是時賈似道當國以軍興國用匱乏特下此令官民駭然莫有應者自榮王倡之繼是惟文耀而已可謂賢而有識者矣使天水宗潢皆能如文耀之公忠體國又豈懼白雁飛來乎甲寅夏五又跋又云癸辛雜識又載春谷在衢州斬大蛇事亦可見膽識庚午夏又識時年七十有八又云趙春谷梅亭曰東風第一見癸辛雜識

會稽三賦

會稽三賦不分卷前題東嘉王十朋撰次剡谿周世則

注郡人史鑄增注

并撰釋音附入

有嘉定丁丑鑄序每葉二十

二行每行大小字二十均空一格黃堯圃主事跋云

宋本會稽三賦往予所見有三本一得諸顧八愚家一

見諸顧五癡處

今歸潛研堂

一見諸顧抱冲所入愚五癡爲

昆仲其兩本悉屬舊藏若抱冲則得諸它處非郡中物

也然皆大字不分卷每半葉九行每行大十八字小卅

二字不等注中有注此板式與前所見者異矣茲本首

載史序第一葉與會稽三賦第一葉誤倒故印記反鈐

于賦之第一葉應正之丙寅穀雨後二日堯翁識

瀛奎律髓

馮已倉定遠二氏評本一用墨一用朱 已倉書後云
已丑再讀一過一閱月而畢生平所得詩法盡在是矣
四月廿八日燈下已倉馮舒 定遠書云家兄讀此書
畢謂余曰吾是非與弟正同耳余意未信今竇伯姪以
此見示取余所評較之真符節之合矣今日求可與言
詩者定何人哉八月廿七日書於小樓之西窗家兄沒
二年矣定遠班識 陸氏書云已倉定遠兄弟稱詩爲
馮氏一家學定遠評駁此書凡有三四本斧季此本其
一也復取他本評語一一載入前後心目庶可考見余
又從友人處見已倉閱本用筆墨錄於卷內以徵兩馮

手眼之同異云甲辰閏六月三日常熟陸貽典識 每册副頁鈐以朱文木印云聚書藏書良匪易事善觀書者澄神端慮淨几焚香勿捲腦勿折角勿以爪侵字勿以唾揭幅勿把穢手勿展食案勿以作枕勿以夾刺隨損隨修隨開隨掩後有得吾書者並奉贈此法余嘗仿此刻一印惟易末二語云後人寶遺書者必當謹守此法

宋人小集

宋人小集十六種 姊壻許梅隱所贈爲何潛齋集傅忠肅文集晁具茨集高彥先集謝幼槃集浮溪集白石道人詩佩韋齋集倚松老人詩瓜廬集雪巖西塍集雪磯

叢稿疎寮集雪林集病榻小集秋江集等 先君子題
云許甥懋董舊藏此南北宋人集十餘家似從江湖羣
賢等集鈔合中間敘跋間有明人手筆惜乎家數寥寥
不及十之二三然終屬舊鈔可存披閱也嘉慶戊午兔
牀識

二妙集

右舊鈔本八卷前有草廬先生序虞伯生先生所撰段
氏世德碑後有泰定四年別嗣輔跋成化辛丑賈定跋
大雅集

右舊鈔本八卷前有錢肅楊維禎及良自序後有王逢
序 先君子命兄壽照書竹垞先生跋于末簡莊徵君

借閱校補數處鈐圖記於卷首

樂志園集

舊鈔本樂志園集八卷後附補遺元崑山呂誠敬夫著
先君子校閱復經黃蕘圃先生以家藏秀野堂鈔本
互勘手書補正脫誤 蕘圃題云此冊爲兔牀山人藏
本并手校者介髯翁示余余取舊藏顧秀野鈔本勘之
大段略同而詞句互有得失至命名則有異此云樂志
園詩集一至八卷余本則分題各爲一集一云來鶴草
堂稿二云旣白軒稿三云竹洲歸田橐鄭文康後記外
又有鶴亭唱和一卷又有十葉亦敬夫詩無集名未知
云何此皆脫之矣卷一內此多南道道中三首半各本

皆空白因據補余本余本竹洲歸田橐內多杖屨云云
至答之此本脫也亦據余本補入鄭記不全亦據余本
足之初余校此冊未半卽病病且幾死自謂校讐事絕
矣幸天憐余之好古書而不致與書永訣新歲謝客竟
畢校此冊良友之託幸遂宿諾予喜而良友當亦共喜
也唯鶴亭唱和已下詩卷帙甚繁不能任此筆墨之勞
矣當俟它日命鈔胥續之嘉慶歲在丁卯陬月哉生明
復翁丕烈記 後附歲暮懷人之一云異地能同好一
州得兩人僑居情久密謂翁過訪跡常親君每過吳屢
寄書相賞會遺畫絕珍蒙君作員髯翁倘歸去爲我
賀新春每歲底託髯翁其鄭文康記及歸田橐內杖屨

帶拜年帖稱賀

云云至答之皆補於卷末前後有堯翁更字復翁堯圃
手校圖記

荆南倡和集

荆南倡和集一卷元馬治季常周砥履道二人遊荆南
酬唱之作也前列鄭元祐序及季常履道自序後爲附
錄亦履道留別季常及寄懷詩寄常所作履道哀辭及
追悼追和詩又有高季迪後序重讀荆南集有感詩徐
幼文李□□張□□諸人題 先君子從鮑氏知不足
齋明初刻本傳錄手校並輯荆南集附錄於後此冊書
後云荆南唱和集一卷元明之交極爲鄭明德高青邱
徐幼文諸公所稱賞傳本絕少予從鮑君以文知不足

齋借得蓋猶明初刻本因亟傳錄其副并采摭記傳爲
增錄係卷末予生平最愛荆南山水之勝往來數十年
行篋未嘗一日無此書今老矣足不能出戶每一展覽
慨想前輩之風流邈不可追并念與荆南朋好疇昔唱
酬文酒之樂不禁爲之闌筆憮然也嘉慶壬申季冬海
甯八十老人吳某跋 此後簡莊徵君題記云嘉慶癸
酉孟春勃海陳鱣借錄并對勘一過

赤霞集

赤霞集一冊五古七古五律七律五言排律七言排律
五言絕句七言絕句各體爲一卷首題赤霞公詩鈔梁
溪浦羲升朗公著下題男伯熊渭飛手錄有陳鼎新閱

自寅序傳略一篇無作者名氏而籤書赤霞集吳鍾巒
選又浦義升崇禎辛未貢一條先君子書後云赤霞
集一卷乾隆己亥秋日購之花溪故家朗公崇禎中嘗
司鐸海昌與許金牛爲布衣交故花溪兩垞之間猶有
傳其集者此編前署男伯熊手錄豈尙其子舊鈔耶按
赤霞集千頃堂書目不列卷數恐尙不止於此是編簽
題爲吳公蠻穉所選則益足重矣竹垞明詩綜錄五律
石城一首周松靄云面書崇禎辛未貢一行恐是醜舛
選詩時手筆果爾則又可喜也長至後二日吳某識又
題予藏此書二十餘年矣每觀封面題字的爲小長蘆
叟筆而松靄大令之言洵不謬也嘉慶乙丑兔牀

南濠文跋

都元敬南濠文跋四卷鈔本無序目

王百穀集

百穀先生集六冊爲晉陵金昌燕市竹箭青雀明月荆溪疏延令纂諸集 先君子記云嘉慶庚申購得百穀先生集其評點者未審何人苕估謂是前輩許仲章明經筆未知然否兔牀志 青雀集有西河毛文煜序 先君子書云此亦毛西河

浙江文鈔

查韜荒先生文鈔其壻談禱初先生所集 先君子傳錄書後云洪翁負卓犖之才學爲竹垞諸公所推服此

橐予從其後人借鈔尙有漸江詩鈔惜未及錄其生平
境遇多輒輒晚客茶陵而沒同邑朱茂才亦大與泚翁
中表兄弟也有悼韜荒詩云路傍香艸霧中花采采其
如秋望賒哀些欲招無處所不知雲雨散誰家觀此是
泚翁楚遊時乃眷一煙花而死於其家亦可慨矣亦大
臣溘日觀先生子也有曉亭詩鈔乾隆甲午春日鈔重
午後三日校于拜經樓

衍齋詩卷

右刻本衍齋詩四卷先子跋云寒中上舍生平與查初
白先生交最莫逆故其詩律之風神流麗一往情深處
頗極相似至擬古樂府詞質意古使人味之不盡雖初

白尙有不及予家去插花山僅一舍每登樓東望惟見
寒烟衰草亂雲滿目慨望昔日之風流非特琴書圖籍
散亡略盡卽道古樓之故址具不可蹤跡頗深生不同
時之恨又云衍齋詩予家尙有大字刊本詩多有不同
蓋刻在後也并附查惜吟香稿雕板甚工

天啟宮詞

右宮詞一百三十首明蔣之翹作前有自序 先君子
校有按語數條 簡莊徵君跋云明詩綜蔣之翹字楚
穉秀水布衣甲申後隱于市詩話楚穉居射襄城詳校
楚辭晉書韓柳文集鏤版以行又輯檇李詩乘四十卷
搜錄鄉黨先正詩無遺兼能備舉軼事使聽者忘倦晚

年無子書籍散佚無餘詩乘亦亡可歎也按明詩綜選
秦楚芳天啟宮詞八首而靜志居詩話嫌其述客魏居
多而事關德陵者寡不無微憾此楚穉所作較之楚芳
作爲詳備乃詩綜並不選入豈竹垞先生猶未見耶鱣
記

擬故宮詞

右鈔本四十首唐字昭作 先君子題云唐字昭字孔
明家富藏書毛斧季嘗聞其有宋槧趙孟奎分類唐詩
一百卷展轉倩友借之而未得詳拜經樓詩話

西村集

西邨老人詩集三卷後附補遺乾隆戊午重刻本 先

君子補錄遺詩五首於卷末跋云余偶得陳勾溪先生手書詩一篇風骨蒼秀如其爲人愛玩不忍釋手吾友陳仲魚復以西村老人詩數首見遺亦其遺墨也書視勾溪雖稍樸致而詩格高雅似又過之因補錄卷末併附勾溪作於後時丁酉十二月免牀後學吳某識

九嶷先生集

右舊鈔本雜文詩詞一卷首敘不著姓氏

棗林詩集

棗林詩集談孺木先生所著凡古近體詩三百三十七首後有錢朝瑋所作傳先君子序見文存續編中此冊用硃筆照原本圈點並附錄竹垞檢討靜志居詩話

他山先生人海記二條於末有按語

遺老高風

右鈔本一冊首爲陳乾初先生山中約次爲祝眉老先生忠魂歸夢記次爲乾初先生東海山臞祝遁角山養吾子蔡遵來雲先生蔡沛黃山大辛子許齋諸公詩又次爲山臞先生項子魂遊記及研譜餘攷餘攷末爲耕煙老農祝子夏斯文快事諸先生詩前有當湖施洪烈三哀詩并序序內謂祝光侯許元五祝開美三君詩則止哭光侯先生者並附與其仲叔季三人詩先君子書後云乾隆丙申重九日登高龍山偶得是書皆海昌遺老詩文雜著雖卷帙無多而流傳絕少予不敢自秘

別錄一本以贈吾友陳君仲魚俾與大學辨諸書同藏于新坂家塾此本則猶是龍山舊鈔也嗟乎南村風景恍焉如昨而諸公高躅邈不可追是一編者將以爲錦里先賢傳觀之可也以爲宋遺民錄觀之亦可也庚子秋七月免牀後學吳某記

古民先生集

右詩一卷陳古民先生手彙集名來雨 先師巢飲夫子記云昔在吳中於許生案頭見古民所書論詩畫冊子遊雲驚龍幾入神品蓋古民時寓硤之薇山書此以贈及門許公葵元也冊後但鈐古民二字圖記而不題姓氏竟不知爲何許人今觀是集書法一如昔年所見

又得兔牀山人表而章之則十餘年之蓄疑一朝頓釋
眞快事也巢飲誌 先君子書後云陳梓字俯恭一字
古銘家秀水之濮院學宗洛閩工詩書法得晉唐之遺
晚右臂病攀常運左筆後居姚江以老此稟詩字俱佳
陳子珍之槎客記時距作詩後一甲子冬十二月朔日
又書觀末載藥酒方豈書此詩時已在攀臂之後乎
又記

尊聞錄

右爲汪水蓮先生

雜憲

所著

先君子從魏君小洲處

得之小洲記云吾杭前輩汪水蓮先生殖品清華學問
淵雅所與交皆知名士偶從市攤拾得此冊雖非足本

味其言論尙友真今之古人聞全帙質存某處需索厚價兼靳借鈔誠恨事也庚午仲冬大雪節前一日小洲誌先君子書云積山名維憲陳句山紫竹山房集有詩集序敘其出處頗詳謂可入獨行傳是編乃魏小洲鉞偶於舊攤購得見眎置之案頭未忍釋也壬申冬仲八十老人吳某志

嶺雲詩鈔

嶺雲詩鈔一卷錢唐魏柳洲先生著原有墨筆評點處先君子評閱用硃筆記前云乾隆乙未五月閱于拜經樓

紅柑齋詩草

海甯查堯卿先生義著先君子傳錄並手書沈歸愚宗伯評語于上

汪氏雜著

此爲同里汪立仁先生所著先君子收藏題後云此前輩汪茂才立仁遺稿也立仁本歙縣人僑居小桐溪少工詩善屬文以屢困場屋悒悒不得志而沒無子遺橐多散逸每展斯編未嘗不爲之興歎也

韜光紀遊詩

右二卷朱人遠許時庵二先生序堇浦先生增注凡墨筆皆先生手蹟也

陸綸山先生集

綸山先生甯遠堂詩無序目後有闕頁

茶洋詩鈔

尙廷楓著內有筆墨圈點面頁題紅樹邨莊詩選

曉亭詩鈔

曉亭詩鈔一卷不分卷同邑朱亦大先生著前有東阿葛仙老題七絕二首並卷內朱墨筆評點

震西贖稿

右詩一冊不分卷吳濩上董掌衡先生

甯銓

著中有與

先王父賞梅詩 先君子題前云嘉慶壬戌冬陳仲魚

孝廉獲此稿見貽以其閒有與先處士觴詠詩也每披

對閒如讀柳州先友記一過 題中同東者爲方鳳逸

王晴巖黃禹璋江寶臣陳種邁諸公方爲余姑丈江亦
吳人先君子記云江寶臣蘇州孝廉時與先子同寓
吳淞治月與伯仲兩兄亦稱莫逆某記又書首頁云
韋衡茂才父維新先生與先君子同庚故交最契

蘭垞詩鈔

蘭垞詩鈔一冊海甯施自勛先生謙著先君子求得
遺藁手爲繕錄並作序云施秀才蘭垞海昌人也少以
能詩受知於鄉之先達頗自矜許及長累困於制科常
鬱鬱不得志雍正乙卯詔州郡舉博學鴻詞蘭垞名
在薦中亦不登第老而厄窮益甚唯放情歌詠以攄其
不平性復狷急善謾罵人以是率不樂與友獨於仁和

杭太史堇浦爲忘年交唱和尤密庚辰仲秋年七十餘
病沒聞伊子前天一孫尙幼意甚悼焉訪其遺藁未得
心恒耿耿以爲憾事今年秋予甥孫煥始從蘭垞長女
家借是編示余爲虛槎神聽非非想三集蓋其手自芟
定者又己巳詩殘帙通得古近體如千首輒欣然爲手
錄之蘭垞生平詩藁如束筍此殆其什一餘多散軼不
傳可惜也竊怪古今來流離不遇之士莫不託諸吟編
冀垂不朽然而湮墜者多矣若唐之張祜王璘竝負不
羈之才蒙薦知己終以傲物自炫墮棄草野慕其文者
皆爲之興歎今張集具在而王作無聞觀推言稱璘日
賦萬言口給十吏則其平日篇章之繁富何如也故知

通塞之理洵有命存而流傳之責的屬來者予無暇論
定蘭垞之詩直重傷蘭垞之不遇而欲麤傳其梗概于
來者云爾元默敦牂十二月立春日默齋吳某書於清
暉閣

釣餘集

右朱吾也先生雜文一冊巢飲先師手寫本 先君子
記後云右朱可人先生名達海甯人諸生英袖先生之
子也

明詩綜

右初印本紙墨竝佳先子記首冊云張爲儒蟲獲軒筆
記朱竹垞先生選明詩綜喜刪改前人之句然有大失

作者之旨者卽如亭林集中禹陵二十韻前半大禹南
巡守相傳此地崩十韻敘禹陵後半往者三光降江千
一障乘八韻敘乙酉魯王監國事而未四句總結之日
望古頻搔首嗟今更附膺會稽山色好悽惻獨攀登詩
綜芟去中間往者十六句則所謂嗟今更拊膺者竟不
知何所指竹垞選此書意欲備一代文獻宜其持擇矜
慎况生平又與亭林交好沒後錄其遺詩似不應鹵莽
至此也爲儒字承之海甯人貢生生平湛深經學惜身
後著述多散佚蟲獲軒筆記四冊予從其從孫謨借觀
起乾隆戊午十二月二十六日立春迄庚申五月三十
日排日而計之大約經解爲多因令猶子昂駒錄其經

解筆記雖尙闕而不全已足見前輩爲學之勤幾寢饋于經籍中矣予家尙有明經所批十三經文鈔亦人閒不可多得之書也嘉慶丙辰八月四日吳某志于拜經樓

斷腸集

詩三卷宋閨秀朱淑真撰 先君子手寫木並附錄百川書志詩女史名媛詩歸宋詩紀事汲古閣校刊題語巖居幽事各條于前又記云某按名媛詩歸選淑真古近體詩凡一百七十餘首

蕭離集

右詩一卷元閨秀鄭允端著舊鈔本首爲錢惟善序次

序不書名氏 先君子記云某按列朝詩集云允端集
曲江老人錢惟善汴人杜寅爲敘傳云云然則此篇蓋
寅筆也次爲至正丙申允端自序末有至正甲辰杜寅
後序 先君子書列朝詩閨名媛詩歸二條于別楮並
書卷首云提要以肅雝集爲僞託

玉窗遺稿

右詩一卷朱巢飲先師手寫本跋云玉窗遺稿予叔高
祖妣葛太孺人之所著也向梓行於康熙辛亥間孺人
中子僑居邑城板曾藏其家坐中落竟散亡無復存惟
長嗣出繼大宗居小桃源故里其元孫筠岑每以先澤
淪亡自恨生晚輒泣然涕下故是集及日觀山人集特

於殘編廢橐中檢搜而珍藏之然就兩書以觀日觀世
尙存十之三而此集幾等碩果矣惜無力重刊以壽諸
世不能闡揚先業傳播芳徽吾亦與有責焉兔牀山人
吳君葵里好古士也庚寅歲余館鳳規去山人室邇甚
嘗偕吾徒陳生誦隅造訪一見如舊相識因窺見案頭
陳相國徐太夫人拙政園詩餘一集係山人所手校付
梓者乃知山人存心風雅本圖探石室之藏大梨棗之
任第以是書爲發軔也頃之山人叩余曰玉窗遺橐君
家物也盍出而一讀乎余唯唯而退歸徧撻故篋中不
可得厥後於從兄筠岑架上檢得是書爲之喜而不寐
迫欲手鈔一本以應山人之請奈薄歲闌俗冗蝟集未

克完寫今春復適鳳垵學舍差得坐定續寫成書并識
數言悲予素不能收藏是書既乏力重刊敢以繕寫爲
勞乎哉然卒得應山人之請不負其好古之心也則又
予之幸也夫時乾隆辛卯孟春下浣小桃源朱型家識
於陳氏之晚香齋

詩因

大清詩因閨門一集亦先師手錄 先君子校正

秋思草堂集

右集爲錢唐女史陸莘行所作老父雲遊始末有其甥
吳磊跋此本爲 先君子手寫並附錄尊前話舊各詩
于後跋云右錄陸氏莘行遺書一卷莘行爲麗京先生

女適袁花祝氏今其後嗣無可考當從祝氏之老訪之
或借其家譜查之不知此外尙有著述否吳某跋

海昌閨秀詩

右爲褚貞周倍齡落花詩王範蕉兩樓吟佟陳氏稿

先君子書周詩後云右落花詩三十律錢唐魏叔子弢
得一便而有蠅頭細楷書此末署癸亥秋盡日錄海昌
女史周倍齡落花詩三十律於林清書舍冷紅姚宗灝
書書法甚精楷冷紅未知何人而周亦不知誰氏之女
也予讀之愛未能釋因借歸命子姪輩錄其副與褚幼
蘭落花絕句三十首合藏諸笥俟世之好事者傳焉海
昌故多才媛由明以來如朱靜庵葛南有陳倫光皆表

表者而倫光素賞樓集中落花三十律尤爲時所傳誦
其警句若沾泥絮果應同證入水萍蹤或再逢死謝春
光臣盡瘁生憎夜雨子成仁散爲巫峽雲無影流出天
台水有情處仲遣姬開後閣季倫看妾墮危樓紫絲帳
外疑無地青粉牆西想有家十六天魔春試舞八千子
弟夜聞歌紅綃別院偷飛月紫玉深宮竟化煙吳郡臺
荒歌舞散漢宮人老畫圖空舊雨新晴諳冷煖今朝昨
日判悲懼雖使須眉操管何以加之僖齡諸作纏綿淒
婉託意隱然蓋亦倫光之後勁歟癸卯冬日槎客吳某
識 書蕉雨吟後云幼嫻爲海甯硤川人太學生涵齋
次女適桐鄉李臨臯早寡無子女夫朱廣文超之輯其

吟稿曰蕉雨樓吟凡三卷古今體詩二卷長短句一卷
余從花溪倪碩翁借得全彙讀之惜其才之饒而志之
苦也詩曰終其永懷又窘陰雨非幼嫻之謂乎會當事
有重修郡乘之舉纂修爲姚江邵太史晉涵分掌藝文
者仁和朱茂才文藻皆於余有故因卽錄集名貽之以
存海昌名媛之一種復摘錄其詩數首于此設有好事
者取其集而梓之當與素賞老人後先輝映矣甲辰中
秋後一日槎客跋 佟陳氏稿前有題云佟陳氏爲海
昌次升封翁女大司空學山先生嫡妹未出閣時所作
秀慧之致已見一斑老荆之母姨也予初婚時偶爾手
鈔及今展閱忽忽五十餘年若倪仰事戊申八月南屏

時年七十有一 先君子書此後云次升名之暹崇禎
丙子舉人學山其長子欽永之號攷陳氏家譜次升凡
五女第四女適三韓佟世南廣東瓊山令第五女名皖
永字倫光適同邑楊中默有詩名著素賞樓集爲時傳
誦惜其姊能吟詠而人罕知者并名字亦無可攷豈爲
若妹所掩耶素賞樓集中間有與姊唱和詩今年秋武
林魏小洲偶得此稟貽予因亟錄之首有戊申八月南
屏題字南屏亦未詳何人也乙巳臘月槎客誌

花月吟

花月聯珠吟十二首爲沈氏涵碧所作及其女雲濤祝
氏竹如同作予姊景昭氏亦有和詩二首附集後 先

君子書卷首云沈氏號涵碧陳清渠太學有爲族祖母
沈花月吟跋會屬余點定

繡餘草

嘉定白印蘭幽谷氏撰 先君子親筆評點餘詳拜經
樓詩話

拜經樓藏書題跋記卷五終

光煦少孤先人手澤半爲蠹魚所蝕顧自幼卽好購藏
三吳間販書者皆茗人來則持書入白太安人請市焉
輒歎曰昔人有言積金未必能守積書未必能讀若能
讀卽爲若市以故架上書日益積稍長欲得舊刻舊鈔
本而茗賈射利之術往往索時下諸刻與易而益之金
則輾轉貿易所獲倍蓰未幾凡余家舊藏世所恆有之
書易且盡矣今計先後哀集者葢得四五萬卷露鈔雪
購其值已不貲而舊刻舊鈔本之中茗買弊更百出割
首尾易序目剔畫以就諱列字以易名染色以偽舊卷
有缺刻他版以雜之本旣亡錄別種以代之反覆變幻
殆不可枚舉故必假舊家藏本悉心警勘然後可安而

吾邑藏書家近數陳簡莊徵君士鄉堂吳兔牀明經拜
經樓願余生也晚均不獲接其緒論徵君沒書籍亦亡
失惟吳氏猶世守之洎與其孫鱸鄉茂才交乃得假拜
經樓善本以校所藏之缺失焉歲丙午鱸鄉下世吳氏
所藏亦不若曩時之易於借觀矣而是書爲鱸鄉尊人
蘇閣先生所記述鱸鄉曾手錄其槩以見遺因投之梓
而附其父子詩文若干首於後以廣其傳并著平日所
閱歷以見購藏之不易苟非若兔床先生之精於鑒別
雖擁書數萬卷未足傲南面百城也道光丁未九月朔
蔣光煦識

國初吾邑東南藏書家首推道古樓馬氏得樹樓查氏

蓋兩家插架多宋刻元鈔而於甲乙兩部積有異本其
珍守已逾數世不僅爲充棟計也兔床先生祖籍休寧
流寓尖山之陽百有餘年矣世以文章經術著稱先生
博綜好古纂述宏富值馬氏查氏遺書散布人間先生
偶得其殘帙流連景慕每繫跋語以寄其慨迨後搜討
益勤兼於吳門武林諸藏書家互相鈔校并與同邑周
松靄大令陳簡莊徵君賞奇析疑獲一秘冊則共爲題
識歌詩以紀其事故拜經樓之藏弄足與道古得樹二
家後先鼎峙嘉慶癸酉先生年八十一下世次君蘇閣
明經彙錄藏書跋語析爲五卷秘之篋衍不以示人歲
己亥余客硤川蔣氏之別下齋時明經沒已數年哲嗣

饒鄉茂才出示遺墨其中辨誤析疑兼及藏書之印記書版之行款鈔書之歲月莫不詳識海昌遺老之載籍世鮮傳本並爲著錄其留心桑梓不僅汲古之深心矣生沐廣文讀而稱善鈔藏其副乙巳之秋饒鄉謝世遺書塵封問奇無自生沐廣文謂拜經題跋實勝讀書敏求記欲廣其傳乃屬庭芬偕許君光清校寫付梓并輯蘇閣明經父子詩文一卷附之余嘗見寒中初白二先生收藏之本皆有跋尾惜無人搜輯以傳兔床先生鉛槧之餘得存此五帙視道古得樹二家爲無憾矣而蘇閣父子保守遺跡累世不怠亦自來藏書家所難能也此書傳蘇閣父子之苦心亦可告慰矣道光丁未重九

前一日鄉後學管庭芬謹跋

拜經樓藏書題跋記附錄

攷

三首見富春軒雜著

宋忠勇軍第三都都虞候朱記攷

吳壽暘 虞臣

右朱記同里陳簡莊徵君從山左東野明經得於揚州
舊城無背文年號可稽並遭磨礪寸度銖兩不盡合制
印文亦多剝損未能明晰安邑宋芝山助教釋作忠勇
軍司延邊事二指揮第二都都虞候記江都江鄭堂文
學釋作司延邊吏簡莊徵君作攷釋爲忠勇軍右進邊
第三指揮弟二都都虞候今細加審辨似當以徵君釋
爲正惟弟二都則當作弟三都篆文殘闕處尙有迹也

攷宋志侍衛親軍步軍司有都指揮使副都指揮使都
虞候各一人所領步軍自神衛而下左右四廂都指揮
使都虞候左右廂各有都指揮使都虞候每指揮有指
揮使副指揮使每都有都頭副都頭十將將虞候等忠
勇軍在步軍神衛下隸侍衛司咸平五年以易州兵能
禽賊者立指揮一成都此印徵君謂是忠勇軍右軍下
第三指揮攷五代史唐傳右左靜邊都指揮使晉紀有
鎮海興武左右廂開道都指揮使是每軍下左右廂指
揮使又各有其號宋沿唐五代之制當不甚異進邊云
者猶靖邊開道之類歟徵君攷又云鄭堂謂此印是高
宗南渡駐蹕維揚倉卒時所鑄按中興通鑑建炎元年

因李綱議募兵仍勅禁軍驍勝北捷忠勇義成龍武虎
威折衝果毅定難靖邊凡十號每號四軍此云弟三指
揮其四軍之一歟又按渡江後官印多亡失禮部更鑄
給之加行在二字或冠年號以別新舊茲不冠以年號
者明此軍初復無新舊之嫌也惟時方草創三衙之制
未備立御營司有御前諸軍都統制容齋五筆載所進
劄子請正三衙之名時不果行然建康志御前諸軍都
統制司題名記王權以龍神衛四廂都指揮使甯州觀
察使殿前司忠勇馬軍統制除武康軍承宣使差充建
康府駐劄御前諸軍都統制是仍帶指揮之職而忠勇
更屬殿前馬軍司矣又建炎後將兵屯駐復有忠勇遊

奕甯宗嘉定三年以江陵忠勇軍爲御前忠勇軍則似此軍廢而復置屢有增易忠勇之號不獨侍衛步軍成都指揮而其典禁衛職近事親固直隸御前者矣此記視予家端拱二年拱聖下十都虞候朱記稍不逮然古色黯然篆法深秀其銅質鑄造不及他印之精整正鄭君所謂倉卒時所鑄者耳嘉慶丁丑九月吳壽暘識

金勾當公事印攷

右金源印長宋尺二寸一分廣同重二十兩柱鈕高寸三分厚五分文曰勾當公事之印背文爲土花繡蝕字盡不能明晰向止釋出正隆四年四字頃復加洗剔定爲六年非四年下有八月二字左旁尙有沐少府監造

五字攷正隆六年爲宋紹興三十一年是年金主亮方
悉師侵宋是以有勾當公事之稱金時本有勾當公此
云勾當公事蓋發兵則給此印猶宋史曹彬歸自江南
進勝子云奉敕差往江南勾當公事同是也其稱汴少
府監者亮以六月至南京四月詔百官先赴南京治事
尙書省樞密院大宗正府勸農司太府少府皆從行此
印鑄于八月故少府上寇以汴字時蓋草創尙不若正
大二年印之稱大明行部興定元年印之稱行宮禮部
歟稽其鑄造歲月與本紀若合符節是否互證惟是背
文填掩須映日視之字迹始顯阮中丞山左金石志所
載第據印文摹入未悉其全也

蒙古景州印攷

甲戌四月於武林天水橋舊肆中得銅官印一朱文四字曰景州之印銅質精純土花斑駁度以宋三司布帛尺長二寸一分強廣二寸一分弱博五分重今權十又三兩七銖柱紐高一寸二分縱徑九分橫徑四分中刻上字背右方正書宣課行三字左方乙未年三月日造七字左側景州印三字篆文屈曲盤迴正書亦古拙有致但有鑄造歲月無年號蓋蒙古太宗七年印也是時爲宋端平二年蒙古未有年號國號但以干支紀歲耳其曰景州之印者按隆平集所載宋制凡節鎮有節度使印隨本司闕則州本吏用本州觀察使印又有州印

文曰某州之印金時節度州印三曰某州節度使之印
曰某州觀察使印曰某州之印元初官制未備景雖刺
史州而未有常員州印尙仍宋金之舊歟其曰宣課行
者攷元史百官志太宗始立十路宣課司選儒術用之
金人來歸者因其故官若行省若元帥則以行省元帥
授之蓋時始有宣差徵收課稅之使大興翁宜泉比部
藏一印曰旁差官印背文無年月但云宣差襄陽唐鄧
軍課稅所成造是課稅所亦掌鑄造之事地理志河間
路景州唐觀州又改景州宋改永靜軍金仍改觀州元
因之至元二年復爲景州據此則太宗時不應有景州
之稱然太祖紀八年癸卯取雄霸莫安河間滄景獻深

祁懿冀恩濮開滑博濟泰安濟南濱棣益都淄濰登萊
沂等郡又十六年辛巳宋京東安撫使張琳以京東諸
郡來降以琳爲滄景濱棣等州行都元帥鄭義傳初事
太宗佩金符山東路都元帥兼景州軍民人匠長官從
伐金子澤襲年老弟江代其職世祖北伐賜金符兼景
州軍民人匠長官中統三年以江子珣爲千戶領景州
新簽一軍千餘皆稱爲景且按世祖紀至元二年閏五
月升脩縣爲景州止言升縣爲州不言改觀爲景元混
一方輿勝覽刊於世祖朝景州沿革亦不書至元改名
之事又大甯路亦有景州潛犖堂跋云大甯路亦有霍
州景州史志無之此書亦未詳其沿革姑記之以俟攷

是或當時旋置旋廢偶存其名歟且大甯非財賦之區而景爲金鐵所產此云宣課其爲河間路審矣迺志與紀傳岐互頗滋疑義殆草創之初輿地名號未能歸一逮中統五年省臣奏請分立省部四方正名而後爲定制歟其以此乙未爲太宗七年者攷太宗六年甲午滅金得中原州郡七年乙未置版籍頒發州郡牌印正其宜矣又攷食貨志元之諸稅皆定于太宗時商賈之稅甲午年之課稅所大都宣課提舉司迄諸路皆定歲入之額此正足與旁差官印相證其皆爲元初制矣若遼南京析津府景州置於興宗重熙中重熙二十四年歲在乙未金之景州先爲河北東路後屬河間改觀州在

後廢帝太安中當世宗大定十五年未改州時歲亦在
乙未然皆宜有年號且與宣課之稱不合故定以爲蒙
古印耳

詩

十五首見
蘇閣吟卷

雲林寺

吳壽暘

靈鷲何茗茗清勝擅幽獨古寺山麓間到門途屢曲冷
然一泓泉澄流漱寒玉清淺不可唾挹之未盈掬奇峯
飛片雲穹然架佛屋複洞挂巖顛危石剖崖腹莊嚴五
百尊山骨何時劖上有古經牀祇樹敷春木幾處婆羅
花紛紛糝輕綠寺僧解嚮導相與殊不俗西澗更追尋
新篁夾修竹鮮翠滴人衣蒼煙俄滿目日暮整歸鞭綠

雲猶可束

秋日寓葛林園次奚丈鐵生韻

頗厭城市煩山居滌炎燠疎雨滴新梧輕煙挂修竹半
榻借僧寮一燈近佛屋高人肯來過相與慰幽獨懷古
登層阿捫蘿徧深谷猶有白雲屯山樵閒共宿

文待詔爲王槐雨侍御寫拙政園圖

園爲陸魯望故宅圖

今藏吾鄉胡上舍爾榮家

五湖煙水鷗鷺邊長虹渺渺浮遙天黃柑綠橘霜林媚
一笠扁舟動秋思甫里舊蹟尊鱸鄉夢隱卜築開溪堂
輞川清曠雲生戶但見槐黃落如雨寒泉一眼渟澄空
花碕蘿磴泉皆紅湘波滿地瀉翠玉寫出千竿萬竿竹

林巒如畫畫如詩筆妙惟有衡山知七十二峯羅几案
割取煙霞纔一半王公本是非常人文安有力扶直臣
閒居灌圃全清節爲政焉能更辭拙君不見吳郡昔著
豸冠坊范公諫聲天下彰又不見黃州南園斬一醉功
成那復論榮悴攜得白雲歸去來待詔有歸
去來辭圖故園夢醒
對三槐緬想清風臨頓里北禪夜靜鐘聲起

東坡先生鹽官四絕句殘碑

安國寺前雙楹樹矯若二疏辭漢去延恩寺裏賢師琴
目空退之無古今當時四海一蘇子擔笠瓊雷寄僧耳
杭州出守到鹽官大悲作記儒通禪興酣清詠動高閣
腕底濤聲天際落揮灑墨妙驚老僧神采外映中藏棱

傳刻好事留貞珉何年流落明湖濱有美堂前秋潑翠

古石飛出吳山雲士鄉主人雅好古忍使零圭蝕苔土

扁舟載過蘇閣中旒謁芸編日爲伍

家君得宋葉百家注東坡先生集因

名藏書處憶昔先生遷黃州尋春亦復城南游

先生有黃州安

蘇閣小房曲檻合修竹何如散髮披襟臨風浴獨有

眼力窺天人修行無物撈世塵埋雪蒼龍凍不死幻作

神犀騰扇底東南文士知所歸學儒學佛通其理鹽官

不可無公詩望湖兼以拜公祠梅守賜墨出涪祐廟側

同此尋堂基響揚邇惟日千紙殘字猶將補栗尾寺門

清暑搖白蓮齋豐香市記年年重將遺墨表靈瑞定有

萬大祥光騰妙智

家君擬重摹一石置寺中

過陳簡莊徵君紫薇講舍

背倚蒼厓閣一間雲生北牖抹煙鬟放翁詩句堪移贈

買宅錢多爲見山

講舍築於硤石西山麓

新坡舊業本黃岡卷軸丹鉛說士鄉

士鄉堂先生現上藏書處重繼

白公吟眺地紫薇花下讀書堂

舊藏英石立峯高二尺許係插花山馬寒中先

生故物賦此紀之卽用先生集中曠野看雲

歌韻

吾家有石瘦而奇嶙峋三尺芙蓉垂彷彿花山花底壓
倒折花枝作雲腳英德靈產高丈尋美人袖舞雲鬢明
小峰峭立衆峯亂也復煙霞成片段南樓道古箋魚蟲

仇池兼伴吟香工海山檻外勢奔走想得風篁同撫手

占鴻漸兮甯高飛樂槃石兮其來歸

寒中先生筮易得漸之二爻因以衍

齋爲號並有坐磐石小影

丙子歲除前六日過吳門訪黃蕘圃主事于士

禮居賦贈二律

雪滿楞伽又歲除乍從江夏識林居千秋盛業歸求古

三世交遊重訪書閣建長恩嵐翠列

主事嘗欲建長恩閣於虎阜圖

傳員嶠墨光舒祇今故蹟摩挲處展對雲山愴有餘

子曾爲蕘翁作員嶠訪書圖時適攜員嶠真逸印因爲贈

數卷遺經獨抱殘延津敢望劍雙完甯知百衲成琴易

未使千元集古難董氏全編供合校重言片帙輔精刊

時方校刊周禮鄭注以明董氏本爲主而校以各宋本
假余家舊藏小字京本重言重意合勘余家本闕春官
及夏官上堯翁出小字宋本夏官並秋官新年好向梅
上許歸余補入更望並得春官成全璧焉
花祝曩歲曾刊梅更與春風補一官
花喜神譜

贈家校庵先生

槐市幽棲比鶴巢

先生居吳之槐樹街

高風幾爲俗情淆
高山此

日方山子萬卷藏書手自鈔

先生祖籍休甯系商山派家藏書皆手鈔精本先君

子嘗以方山子相掇

寒公寂後逸煙霞望裏支硯水墨除

嘗舉詩社於支硯與釋寒石唱酬尤

密珍重篋中詩畫筵深山雨過落松花

先生嘗贈先君子畫扇並題句

云決決泉流漾淺沙深山雨過落松花
閒來偶踐山僧約留得先春願渚茶

中秋前四日海鹽張樸谷以秋濤古琴見寄

無絃幾識爨桐聲忽在
金徽致逸情一曲清風來海上
滿天涼月晚潮生

丁丑三月望日從臨江鄉魏小洲處接葉東卿
去臘寄書並熹平石經論語殘字

西湖草綠柳飛絲已過江南
穀雨天孤雁睽違經隔歲

書爲鮑牧堂攜致余與牧堂別三年矣
同心想望路三千奇文曾錄圓橋

外東鄉曾刻覃溪學士所募太學石鼓弟入殘文
殘石重蒐廣政前卻憶臨江

蕉萃客何時商畧共遺編
小洲嘗得蜀石經毛詩殘序先子曾摹副本並著考異二

卷未及付梓小洲擬刻先生遺著亦未果

朱西村先生墓次張石樓韻

高隱不可作遺邛千古尊
青山白雲外梅鶴與招魂月

冷瀛洲社風清處土村招來華表客猶噫嘯臺孫

時石樓有

追懷太白
山人詩

黃岡古錢歌

道光二年九月二十九日黃岡石佛寺橋農家於麥隴中得古錢一

甕文多五銖間有常平五銖大貨六銖五行大布等錢皆南北朝物也按鄱陽泉志梁武帝鑄錢肉好周郭一文曰五銖張合曰五銖錢皆無好郭惟此一有之此五銖徑漢尺一寸稍贏重今權九分稍弱肉緣較濶幕有好郭始梁製數常平五銖鑄於齊文宣天保四年大貨六銖在陳太建之六年攷南史顧越傳所居新成黃岡世有鄉枝家傳儒學仕梁陳卒於太建元年此豈其後人所遺耶閱今千三百有餘載翠采赤斑鮮妍欲滴摩挲賞玩足證新坡遺蹟爰賦此以詒諸論古者

黃岡古木秋明瑟古寺溪橋趨石佛稻雲被隴漸登場
宿麥抽秧新啟塍腰鎌忽訝土痕移觸手俄驚破甕出

繡鋪碧草色斑斑彩炫青
蚨風拂拂村童撲滿直相當

購置書窗名品列製沿孝建或僅傳

聞尙有二銖四銖等錢

模改

齊宣時可悉貨泉並得稽師利大布還稱彌羅突就中
獨數五銖錢珠貫纍纍餘百十圍徑慮虎寸稍羸重不
及今銖之一幕有好郭漫無郭肉篆分明輪緣濶紀年
應與溯蕭梁女稚角錢堪共說緬懷江左幾滄桑紛紛
南北輸軍實中都銀幣革東昏流傳三吳貨充溢一自
江陵敵燄驕歌闌敕勒邊聲切銀甕難椎玉璧堅石頭
幾下金陵缺空餘洲苑鎮錢龍安見柱文堪易轍於時
耆舊老邨園新坂家學惟傳述兩朝講幄秩胥崇北使
東歸彌守潔時經太建又歷年不數宇文更幣日薶藏

或又後賢遺籙金豈是編金埒孤燈落日寒煙碧遠水

淨空嵐翠活叢林廣福湖遺碑太平廣福寺碑元至正三年沈景顏撰文俞伯

和依稀鐘梵雲山徹家藏太平鐘梵畫幅款署石谷卻意當年楊殿間

夏畦過雨兼飛楔復有具區源百斛踴然太古并州鐵

先人歌詠志遺聞遠寄紫芝偕考核乾隆乙未楊殿村農於雷雨後土中

得雷斧及古錢數十千皆越宋時物先君賦越錢行紀事乙巳歲旱太湖水涸土人於湖底掘得獨木舟一中

有梁五銖錢三百餘千先君購得百餘特以數枚寄周耕厓先生都中爲賦長歌祇今故物同

陳迹慨想流風滋哽咽遺編三復瘞錢篇書塾試從追

往哲黃岡書塾額元周伯琦書

附詩五首見雲根室偶存稿

朝登萬蒼山望永安湖

吳之涓續集

夕息溪灣舟晨尋溪上嶺躡屨緣坡陀停策披榛梗
叢篠暖新雲喬林耀初景飛泉濺足清浮翠侵衣冷
盤紆徑漸微步仰飛鳥引探奇景不延濟勝力偏逞
絕頂一振衣曠區重引領遙青迎列峯秀綠挹修眇
迴渚開煙光重湖出鏡影漁舟繞菰蒲野鷺掠萍荇
目送山間禽啼入柳陰靜疎花明倦眸遠鐘發深省
心會多妙理情移無止境孫登隱跡遙許掾遊蹤泯
願追高士風重泛湖中艇

程孝子行

硤石程翁昌期字秋雨以孝行稱鄉

焉而以生輓爲言竊思古人親沒遇生辰不
忍置酒張樂以避生也翁之意合乎古人益

以見其孝思之永也
爰爲賦孝子行云

程孝子生寒素負土山中築親墓夙懷風木悲還撫
塚間樹年且躋耄耄心猶切孺慕慕親日日展親塋
春露秋霜頻心驚時過若駒隙事死常如生子事縱
盡禮親死長已矣蓼莪偶誦哀頓深鮮民生誠不如
死於今大德臻大年客來擬賦稱觥篇孝子敬謝客
致辭先泣然人無父母生日倍悲痛此程伊川
先生語祖訓
夙承溯宋賢身不及舞老萊綵詎忍醉吟香山筵惟
慕泉明自輓意聊冀知交情見一死前我聞此語因
追憶相與交已三世歷不須更作北邙歎更頌南山
什古之遺孝永名世無極特表程鄉百世式

擬唐人贈遠

別時見楊柳歲暮未還家君看風前雪還如楊柳花

秋日登學宮尊經閣

林杪出書樓梯雲到上頭煙光萬井暮砧響一城秋
檐瞰浮圖聳窗銜碧海流一登衆山小遐想聖門遊
題蔣生沐廣文雪艇傳賤圖次韻

消寒合尊坐相促不供醉吟徒醉伏吾人愧乏梁園
才白雪歌高難再續聞子呵毫獨鍊詩滌筆冰甌稟
清福辭殫韻劇倡屢和新詠能矴俗耳俗郵笥傳誦
如樂天香名勝飲防風粥想得溪船夜棹回手裂看
詩還把燭畫師解傳詞客事帆滿寒翼見飄沐鵝湖
渺渺接錢湖雲樹模糊共遙矚

君詩多疊錢唐汪
丈劍秋見酬韻我

家陶舫曾載詩細雨東風一蓑綠

陽羨吳菊畦處士
曾爲先大父作載

圖詩者舊風流杳莫追畫中泚泐空馳目

拜經樓藏書題跋記附錄終